



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13, 89/16 i 5/22) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08 i 5/22), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2020. GODINU NEZAVISNE BOSANSKOHERCEGOVAČKE LISTE

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA.....	5
Predmet pregleda i kontrole	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1 NALAZI.....	5
5.2 PREPORUKE.....	11

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Nezavisne bosanskohercegovačke liste za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih 2020. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15. Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2020. godinu, utvrđeno je da je Nezavisna bosanskohercegovačka lista prekršila odredbe člana 4. stav (1), člana 5. stav (4), člana 6. stav (2), člana 8. stav (4), člana 11. stav (1) i člana 12. stav (1), stav (3) i stav (4) Zakona o finansiranju političkih stranaka i odredbe člana 15.1 stav (1) Izbornog zakona Bosne i Hercegovine.

Na osnovu našeg pregleda, odnosno kontrole finansijskog izvještaja, osim gornjih napomena, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Nezavisne bosanskohercegovačke liste za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih 2020. godine.

Pregled i kontrola finansijskih izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Nezavisna bosanskohercegovačka lista se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	1.220,00	0,80
2.	Prilozi fizičkih lica (3-a)	66.361,44	43,81
3.	Prilozi pravnih lica (3-b)	21.950,00	14,49
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	61.942,04	40,90
8.	Prihodi od propagande (3-g)	0,00	0,00
I	Ukupni prihodi (1-8)	151.473,48	100,00
II	Ostali prihodi i drugo	0,00	0,00
	Izvori finansiranja (I+II)	151.473,48	100,00

U godišnjem finansijskom izvještaju za 2020. godinu, Nezavisna bosanskohercegovačka lista iskazala je rashode u ukupnom iznosu od 192.163,82 KM.

2. PREDSTAVLJANJE POLITIČKE STRANKE

Naziv političke stranke: Nezavisna bosanskohercegovačka lista. Skraćeni naziv: NBL.

Nezavisna bosanskohercegovačka lista je registrovana kod Općinskog suda u Sarajevu, Rješenjem broj: 065-0-F-17-000016 od 14.12.2017. godine.

Sjedište političke stranke je u Sarajevu, ulica Obala Kulina Bana 24.

Lice ovlašteno za zastupanje stranke je Ibrahim Hadžibajrić, predsjednik.

Lice ovlašteno za podnošenje finansijskog izvještaja za 2020. godinu je Nermina Jusić.

U okviru organizacione strukture Nezavisna bosanskohercegovačka lista je u godišnjem finansijskom izvještaju za 2020. godinu navela samo Sjedište stranke, te konstatovala da nema niže organizacione dijelove.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Nezavisne bosanskohercegovačke liste za 2020. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih 2020. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka, te da li je ostvarila troškove izborne kampanje u okviru zakonom utvrđenog limita.

Obim pregleda i kontrole finansijskog izvještaja Nezavisne bosanskohercegovačke liste obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju je izvršila pregled i kontrolu godišnjih finansijskih Nezavisne bosanskohercegovačke liste za period od 2017. do 2019. godine, nakon kojih su izdati izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja Nezavisne bosanskohercegovačke liste za 2019. godinu, izdat je Izvještaj o pregledu sa mišljenjem revizora, nalazima revizije i preporukama stranci: da finansijska sredstva osigurana za finansiranje političke stranke koristiti u skladu sa svojim planom, odnosno programom utroška sredstava, da poslovne knjige vodi u skladu sa računovodstvenim propisima i da obrati pažnju na ispravnost i vjerodostojnost knjigovodstvenih isprava, da uspostavi potpune i tačne evidencije o prihodima, rashodima i obavezama stranke, da finansijske izvještaje koje podnosi Centralnoj izbornoj komisiji BiH popunjava u skladu sa njenim podzakonskim aktima i da dostavlja i drugu dokumentaciju koju od nje zatraži Centralna izborna komisija Bosne i Hercegovine.

Nerealizovane preporuke:

Na osnovu uočenih nedostataka u godišnjem finansijskom izvještaju za 2020. godinu, utvrđeno je da Nezavisna bosanskohercegovačka lista nije ispoštovao sve preporuke.

5. NALAZI I PREPORUKE

5.1 NALAZI

a) Nezavisna bosanskohercegovačka lista prekršila je odredbe člana 4. stav (1)¹ Zakona o finansiranju političkih stranaka.

Uvidom u Plan utroška sredstava za 2020. godinu koji je dostavila Nezavisna bosanskohercegovačka lista, utvrđeno je da je stranka planirala troškove u ukupnom iznosu od 192.813,01 KM, dok je u godišnjem finansijskom izvještaju iskazala ukupne troškove u iznosu od 192.163,82 KM.

¹ Prema odredbama člana 4. stav (1) Zakona o finansiranju političkih stranaka, finansijska sredstva iz člana 3. stav (1) navedenog Zakona stranka može koristiti isključivo za ostvarivanje ciljeva utvrđenih svojim programom i statutom.

Međutim, Planom utroška sredstava, Nezavisna bosanskohercegovačka lista nije planirala troškove u ukupnom iznosu od 7.096,64 KM koji se odnose na: bruto plate zaposlenih u iznosu od 6.506,43 KM, troškove goriva i maziva u iznosu od 520,01 KM i troškove obezbjeđenja u iznosu od 70,20 KM.

S obzirom da Nezavisna bosanskohercegovačka lista nije finansijska sredstva utrošila u skladu sa Planom utroška sredstava, prekršila je odredbe člana 4. stav (1) Zakona o finansiranju političkih stranka.

b) Nezavisna bosanskohercegovačka lista prekršila je odredbe člana 5. stav (4)² Zakona o finansiranju političkih stranaka.

Pregledom godišnjeg finansijskog izvještaja Nezavisne bosanskohercegovačke liste, utvrđeno je da je stranka primila nenovčanu donaciju od fizičkog lica koje je vodilo plaćenu izbornu kampanju prije službenog početka izborne kampanje na društvenoj mreži „Facebook“, te istu nije evidentirala u poslovnim knjigama i nije iskazala u godišnjem finansijskom izvještaju, čime je prekršila odredbe člana 5. stav (4) Zakona o finansiranju političkih stranaka.

Uvidom u Odluku Centralne izborne komisije Bosne i Hercegovine broj: 05-1-07-5-1062/20 od 28.10.2020. godine, utvrđeno je da je Mujanović Hašim, kandidat stranke za načelnika Općine Zavidović, putem društvene mreže „Facebook“ vodio plaćenu izbornu kampanju prije službenog početka izborne kampanje. Iznos donacije nije moguće utvrditi iz razloga što ista nije evidentirana u poslovnim knjigama, niti prijavljena u finansijskom izvještaju, a politička stranka u vezi sa navedenom donacijom nije dostavila bili kakvu dokumentaciju.

c) Nezavisna bosanskohercegovačka lista prekršila je odredbe člana 6. stav (2)³ Zakona o finansiranju političkih stranaka.

Pregledom godišnjeg finansijskog izvještaja, utvrđeno je da stranka, priloge od fizičkog lica u iznosu od 3.618,21 KM⁴ nije uplatila na transakcijski račun Centrale stranke, čime je prekršila odredbe člana 6. stav (2) Zakona o finansiranju političkih stranaka.

U skladu sa odredbama člana 6. stav (2) Zakona o finansiranju političkih stranaka, dobrovoljni prilozi u novcu uplaćuju se na transakcijski račun centrale političke stranke.

d) Nezavisna bosanskohercegovačka lista je prekršila odredbe člana 8. stav (4)⁵ Zakona o finansiranju političkih stranaka.

Na osnovu obavljenog pregleda godišnjeg finansijskog izvještaja, utvrđeno je da je Nezavisna bosanskohercegovačka lista primila priloge u iznosu od 7.500,00 KM od pravnih lica koja su imala sklopljene ugovore o javnoj nabavci radova sa Ministarstvom sigurnosti BiH i Općinom Kakanj, čija je vrijednost veća od 10.000,00 KM, čime su prekršene odredbe člana 8. stav (4) Zakona o finansiranju političkih stranaka.

² Političke partije dužne su da vode evidenciju o prijemu članarina i dobrovoljnih priloga, te da izdaju potvrde o prijemu članarina i dobrovoljnih priloga.

³ Dobrovoljni prilozi u novcu uplaćuju se na transakcijski račun centrale političke stranke.

⁴ Prema izjavi stranke u komentaru na preliminarni izvještaj, fizičko lice se odreklo isplate plate u svrhu donacije za rad stranke.

⁵ Privatna preduzeća koja su sa organima izvršne vlasti na svim nivoima u BiH sklopila ugovor o javnoj nabavci usluga, ugovor o javnoj nabavci robe ili ugovor o javnoj nabavci radova u skladu sa propisima o javnim nabavkama u BiH ne mogu finansijski pomagati političke partije ako vrijednost ugovora u jednoj kalendarskoj godini prelazi iznos od 10.000,00 KM.

- Stranka je dana 20.09.2020. godine primila prilog od pravnog lica „Relax Tours“ d.o.o. Sarajevo u iznosu od 7.000,00 KM. Prema podacima iz akta broj: 04-16-4-7562-1/21 od 29.11.2021. godine, koje je dostavilo Ministarstvom sigurnosti BiH, utvrđeno je da je pomenuto ministarstvo dana 27.07.2018. godine potpisalo okvirni sporazum sa pravnim licem „Relax Tours“ d.o.o. Sarajevo za nabavku avio karata na period od dvije godine. Po ovom sporazumu realizovano je 155.257,50 KM, a od čega je tokom 2020. godine realizovano 16.377,50 KM sa uračunatim PDV⁶.
- Nezavisna bosanskohercegovačka lista je dana 26.10.2020. godine primila prilog od pravnog lica „DSM Trade“ d.o.o. Kakanj u iznosu od 500,00 KM. Prema podacima iz akta broj: 08/1-117/22 od 19.01.2022. godine, koje je dostavila Općina Kakanj, utvrđeno je da je pomenuta općina potpisalo ugovor broj: 02/1-3940/20 od 08.05.2020. godine sa pravnim licem „DSM Trade“ d.o.o. Kakanj za nabavku robe za opremanje izolacionog centra za ublažavanje posljedica pandemije Corona virusa (Covid-19) ukupne vrijednosti 18.848,70 KM sa uračunatim PDV.

e) Nezavisna bosanskohercegovačka lista prekršila je odredbe člana 11. stav (1)⁷ i člana 12. stav (1)⁸, stav (3)⁹ i stav (4)¹⁰ Zakona o finansiranju političkih stranaka i odredbe člana 15.1 stav (1) Izbornog zakona Bosne i Hercegovine.

Na osnovu obavljenog pregleda godišnjeg finansijskog izvještaja i dodatne dokumentacije, utvrđeno je da Nezavisna bosanskohercegovačka lista nije poslovne knjige vodila u skladu sa računovodstvenim propisima, nije uspostavila tačne evidencije o prihodima, rashodima i obavezama, nije prijavila sve organizacione dijelove stranke i nije obrasce godišnjeg finansijskog izvještaja za 2020. godinu popunila u skladu sa Pravilnikom o godišnjim finansijskim izvještajima političkih stranaka („Službeni glasnik BiH“, broj: 96/13 i 89/16) - u daljnjem tekstu: Pravilnik, čime je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Politička stranka nije uspostavila evidenciju o dijelu troškova izborne kampanje, čime je prekršila odredbe člana 12. stav (3) Zakona o finansiranju političkih stranaka i odredbe člana 15.1 stav (1) Izbornog zakona Bosne i Hercegovine.

(1) U godišnjem finansijskom izvještaju, koji je stranka podnijela Centralnoj izbornoj komisiji BiH, na obrascu 1. (opći podaci o političkoj stranci) stranka je navela da nema niže organizacione dijelove. U obrascu 1.1 (Opći podaci o političkoj stranci - teritorijalna organizacija političke stranke), navela je da ima samo Sjedište stranke.

Kontrolom ugovora o zakupu poslovnih prostora, utvrđeno je da je Nezavisna bosanskohercegovačka lista tokom 2020. godine imala zakupljene poslovne prostore osim u Sarajevu i u gradovima: Zenica, Goražde i Srebrenik, što ukazuje na činjenicu da je stranka, osim sjedišta imala i druge organizacione dijelove, ali ih nije prijavila u godišnjem finansijskom izvještaju.

S obzirom da nije prijavila organizacione dijelove i navela podatke o istima, politička stranka je prekršila odredbe člana 10. Pravilnika.

(2) Nezavisna bosanskohercegovačka lista godišnji finansijski izvještaj, suprotno odredbama člana 5. Pravilnika, nije popunila po organizacionim dijelovima stranke.

⁶ Obavještenja o dodjeli ugovora za okvirni sporazum, broj: 268-1-2-27-9-3/20 od 03.02.2020. godine.

⁷ Politička stranka dužna je voditi poslovne knjige i podnositi finansijske izvještaje na način koji je utvrđen zakonom i drugim propisima u skladu sa zakonom.

⁸ Politička stranka vodi evidenciju o svojim prihodima i rashodima.

⁹ Politička stranka podnosi poseban finansijski izvještaj za period izborne kampanje na način kako je utvrđeno Izbornim zakonom Bosne i Hercegovine.

¹⁰ Do 31.03. naredne godine politička stranka podnosi finansijski izvještaj u formi koju odobri Centralna izborna komisija BiH.

- (3) Stranka je u obrascu 2 (pregled prometa svih transakcionih računa političke stranke) pogrešno iskazala podatke o novčanom toku putem transakcijskog računa, čime je prekršila odredbe člana 11. Pravilnika.

Stranka je u godišnjem finansijskom izvještaju na transakcijskom računu, broj: 1011040071927717 kod Privredne banke d.d. Sarajevo, iskazala promet ulaza u iznosu od 147.914,91 KM i promet izlaza u iznosu od 183.828,35 KM. Kontrolom prometa izvoda sa pomenutog transakcijskog računa, utvrđeno je da je promet ulaza iznosio 148.324,41 KM i promet izlaza u iznosu od 184.237,85 KM.

- (4) Nezavisna bosanskohercegovačka lista, suprotno računovodstvenim propisima i odredbama člana 11. stav (1) Zakona o finansiranju političkih stranaka, u poslovnim knjigama nije uspostavila potpune i tačne evidencije o svojim prihodima i rashodima. Takođe, ni u godišnjem finansijskom izvještaju, koji je podnijela Centralnoj izbornoj komisiji BiH stranka nije iskazala tačne podatke o prihodima i rashodima, čime je prekršila odredbe člana 13., 14. 18., 21. i 23. Pravilnika.

- (5) Politička stranka, suprotno odredbama člana 12. stav (1) i stav (3) Zakona o finansiranju političkih stranaka i odredbama člana 15. stav (1) Izbornog zakona Bosne i Hercegovine, nije uspostavila evidenciju o donacijama, niti je u godišnjem finansijskom izvještaju prijavila troškove po osnovu objave na društvenoj mreži „Facebook“, za kandidata ove političke stranke za načelnika Općine Zavidovići, kao što je navedeno pod tačkom b).

- (6) Stranka u godišnjem finansijskom izvještaju, troškove nije iskazala po organizacionim dijelovima, nije iskazala tačne podatke o troškovima zakupa poslovnih prostora, troškovima ugovora o djelu i troškovima takse za ovjeru za učešće na izborima, te nije izvršila klasifikaciju troškova izborne kampanje, čime je prekršila odredbe člana 12. stav (1), (3) i (4) Zakona o finansiranju političkih stranaka i odredbe člana 21. i 22. Pravilnika.

1. Nezavisna bosanskohercegovačka lista je u godišnjem finansijskom izvještaju iskazala ukupne troškove u iznosu od 192.163,00 KM, i to kao troškove Sjedišta stranke, a ne po organizacionim dijelovima stranke, što nije u skladu sa Pravilnikom.

2. Stranka je u godišnjem finansijskom izvještaju iskazala ukupne troškove zakupa u iznosu od 21.594,98 KM koji se odnose na troškove zakupa poslovnih prostora koje je stranka koristila za svoj rad u iznosu od 13.731,87 KM i na ostale zakupe u iznosu od 7.863,11 KM (zakup javnih površina u iznosu od 7.379,11 KM i zakup sala u iznosu od 484,00 KM).

Uvidom u ugovore o zakupu poslovnih prostora koje je stranka koristila za svoj rad, utvrđeno je da je stranka ostvarila troškove zakupa poslovnih prostora za svoj rad u iznosu od 11.628,00 KM i da je pored prostora Sjedišta stranke, za svoj rad koristila poslovne prostorije u još tri grada.

- Nezavisna bosanskohercegovačka lista je dostavila ugovor o zakupu poslovnog prostora od 01.10.2018. godine sa trajanjem do 31.10.2020. godine, koji je zaključen sa fizičkim licem Suadom Halilovićem iz Srebrenika, na osnovu koga je utvrđeno je da je stranka tokom 2020. godine koristila poslovni prostor deset mjeseci uz mjesečni zakup od 165,00 KM i po tom osnovu ostvarila troškove zakupa poslovnog prostora u iznosu od 1.650,00 KM. U poslovnim knjigama stranka je evidentirala troškove zakupa u Srebreniku u iznosu od 1.980,00 KM.

- Uvidom u ugovor o zakupu poslovnog prostora, broj: 77/2020 od 06.03.2020. godine i traje do 31.12.2022. godine koji je zaključen sa pravnim licem „Unipromet“ d.o.o. Sarajevo,

utvrđeno je da je stranka tokom 2020. godine koristila poslovni prostor deset mjeseci uz mjesečni zakup od 397,80 KM i po tom osnovu ostvarila troškove zakupa poslovnog prostora u iznosu od 3.978,00 KM. U poslovnim knjigama stranka je evidentirala troškove zakupa u Sarajevu u iznosu od 3.451,87 KM.

- Stranka je dostavila ugovor o zakupu poslovnog prostora koji je zaključen sa pravnim licem „ŽGP“ d.o.o. Zenica, broj: 01.10/2019 od 20.10.2019. godine na period do 31.12.2022. godine. Ovim je utvrđeno da je stranka tokom 2020. godine koristila poslovni prostor 12 mjeseci uz mjesečni zakup od 100,00 KM i po tom osnovu ostvarila troškove zakupa poslovnog prostora u iznosu od 1.200,00 KM. Stranka je u poslovnim knjigama evidentirala troškove zakupa u Zenici u iznosu od 1.100,00 KM.
- Nezavisna bosanskohercegovačka lista je dostavila ugovor o zakupu poslovnog prostora koji je zaključen sa fizičkim licem Fadilom Hubjer iz Goražda dana 31.12.2019. godine na period od 12 mjeseci. Ovim je utvrđeno da je stranka tokom 2020. godine koristila poslovni prostor uz mjesečni zakup od 400,00 KM i po tom osnovu ostvarila troškove zakupa poslovnog prostora u iznosu od 4.800,00 KM. Stranka je u poslovnim knjigama evidentirala troškove zakupa u Goraždu za 18 mjeseci u iznosu od 7.200,00 KM.

Pregledom godišnjeg finansijskog izvještaja, utvrđeno je da je stranka evidentirala troškove zakupa poslovnog prostora u momentu plaćanja, a ne u momentu nastanka troškova, što je suprotno računovodstvenim načelima.

3. Stranka je u godišnjem finansijskom izvještaju iskazala troškove ugovora o djelu u iznosu od 28.166,06 KM, dok su isti u poslovnim knjigama evidentirani u iznosu od 28.462,09 KM.
 4. Nezavisna bosanskohercegovačka lista je u godišnjem finansijskom izvještaju ukupne troškove izborne kampanje, u iznosu od 106.070,88 KM, prijavila kao ostale troškove propagande. U skladu sa odredbama člana 15.1 stav (1) Izbornog zakona BiH politička stranka je bila obavezna izvršiti klasifikaciju troškova, te ih iskazati na obrascu 4.2 (troškovi propagande) u skladu sa odredbama iz člana 23. stav (1) tačka b) Pravilnika.
 5. Stranka je u godišnjem finansijskom izvještaju je iskazala troškove takse za ovjeru učešća na Lokalnim izborima 2020. godine u iznosu od 5.800,00 KM. Po Odluci Centralne izborne komisije BiH, broj: 06-1-07-3-163/21 od 25.02.2021. godine, stranka je ostvarila pravo na povrat dijela uplaćenog novčanog iznosa takse za ovjeru učešća na Lokalnim izborima 2020. godine u iznosu od 3.800,00 KM, tako da su stvarni troškovi takse za učešće na Lokalnim izborima iznosili 2.000,00 KM.
- (7) Pregledom su utvrđeni nedostaci kod računa dobavljača, koji su knjigovodstvene isprave o nastalim poslovnim događajima. U skladu sa računovodstvenim propisima, knjigovodstvena isprava mora biti potpuna, istinita, računski tačna i uredna, sačinjena tako da omogućava potpun uvid u vjerodostojnost dokumenta. Sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

Računi na osnovu kojih je Nezavisna bosanskohercegovačka lista evidentirala i platila troškove izborne kampanje ne predstavljaju ispravne i vjerodostojne knjigovodstvene isprave.

Uvidom u račune pravnih lica: „Hidex“ d.o.o. Sarajevo, broj: 00051/20 od 26.05.2020. godine u iznosu od 594,95 KM, „Europlakat“ d.o.o. Sarajevo, broj: 824-10/20 od 12.10.2020. godine u iznosu od 3.209,13 KM, „Televizija 8“ d.o.o. Sarajevo, broj: 393-20-F od 14.10.2020. godine u iznosu od 4.275,18 KM, „Max Media“ d.o.o. Sarajevo, broj: 733/2020 od 20.10.2020. godine u iznosu od 210,60 KM i broj: 778/20 od 27.10.2020. godine u iznosu od 2.808,00 KM, „Biograf štamparija“ d.o.o. Bihać, broj: 0258/20 od 20.10.2020. godine u iznosu od 1.145,43 KM, „Klix“

d.o.o. Sarajevo, broj: 1218/20 od 21.10.2020. godine u iznosu od 5.850,00 KM i „Raport.ba“ d.o.o. Sarajevo, broj: 22/20 od 27.10.2020. godine u iznosu od 2.500,00 KM, utvrđeno je da pomenuti računi nisu potpisani od strane korisnika usluga, nije potvrđen prijem promotivnog materijala, niti izvršenje usluge.

- (8) Uvidom u izdate potvrde o primljenim priložima od pravnih lica, utvrđeno je da iste ne sadrže sve elemente propisane članom 6. Pravilnika o godišnjim finansijskim izvještajima političkih stranaka. Pregledom izdatih potvrda o donacijama pravnih lica, utvrđeno je da iste ne sadrže identifikacioni broj donatora, adresu i sjedište donatora.

U skladu sa članom 6. stav (1) Pravilnika o godišnjim finansijskim izvještajima političkih stranaka, politička stranka je dužna svakom fizičkom i pravnom licu od kojeg je primila članarinu ili prilog izdati potvrdu u kojoj su sadržani sljedeći podaci: naziv političke stranke, serijski broj potvrde, ukupan iznos članarine/priloga, ime i prezime/naziv donatora, broj ličnog dokumenta/identifikacioni broj donatora, adresa i mjesto prebivališta/sjedišta donatora, datum uplate, datum izdavanja potvrde i potpis ovlaštenog lica.

- (9) Nezavisna bosanskohercegovačka lista je u obrascu 5 (obaveze političke stranke) godišnjeg finansijskog izvještaja iskazala obaveze u iznosu od 5.530,22 KM, dok je u Bilansu stanja na dan 31.12.2020. godine, evidentirala obaveze u iznosu od 5.541,00 KM.

Međutim, uvidom u ugovore o zakupu poslovnih prostora u 2020. godini, te evidencije o ostvarenim i plaćenim troškovima zakupnine, utvrđeno je da politička stranka nije iskazala u poslovnim knjigama i godišnjem finansijskom izvještaju obaveze prema pravnom licu „Unipromet“ d.o.o. Sarajevo u iznosu od 526,13 KM i pravnom licu „ŽGP“ d.o.o. Zenica u iznosu od 100,00 KM.

Nepotpunim i netačnim evidencijama o svojim obavezama politička stranka je prekršila odredbe člana 24. Pravilnika.

f) Nezavisna bosanskohercegovačka lista nije postupila u skladu sa odredbom iz člana 4.4 stav (1) Izbornog zakona Bosne i Hercegovine.

Politička stranka je u prijavi za ovjeru za učešće na Lokalnim izborima 2020. godine prijavila transakcijski račun, broj: 1011040071927717 otvoren kod Privredne banke Sarajevo. Iako je u skladu sa Odlukom o visini takse za ovjeru za učešće na Lokalnim izborima 2020. godine, broj:05-1-7-3-373-1/20 od 28.04.2020. godine, bila obavezna da sa navedenog računa ulatiti taksu za izbore i plaća isključivo troškove izborne kampanje, stranka je postupila suprotno odredbi člana 4.4 stav (1) Izbornog zakona BiH i odrebi ove Odluke.

- Nezavisna bosanskohercegovačka lista je taksu za ovjeru učešća na Lokalnim izborima 2020. godine uplatila sa redovnog transakcijskog računa stranke broj: 1011040072157413 kod Privredne banke Sarajevo.

- Sa namjenskog računa za finansiranje troškova izborne kampanje politička stranka je, pored troškova izborne kampanje, vršila i sva druga plaćanja proistekla iz njenog redovnog poslovanja.

Troškove izborne kampanje politička stranka je prijavila u iznosu od 106.070,88 KM, a putem namjenskog računa za finansiranje troškova izborne kampanje ostvarila je promet u iznosu od 183.828,35 KM¹¹.

¹¹ Uvidom u izvode sa transakcijskog računa, utvrđen je promet u iznosu od 184.237,85 KM.

Troškovi izborne kampanje

Prema odredbama člana 15.10 Izbornog zakona Bosne i Hercegovine politička stranka za potrebe izborne kampanje ne smije potrošiti više od 0,30 odnosno 0,20 KM¹² po biraču u svakom izbornom krugu, prema broju birača koje je objavila Centralna izborna komisija BiH.

Prema podacima Centralne izborne komisije BiH, Nezavisna bosanskohercegovačka lista je u svrhu izborne kampanje za Lokalne izbore 2020. godine mogla da potroši 501.351,57 KM, a u svrhu izborne kampanje za Lokalne izbore u Mostaru 2020. godine, mogla je da potroši sredstva u iznosu od 30.259,20 KM.

Nezavisna bosanskohercegovačka lista je u godišnjem finansijskom izvještaju za 2020. godinu iskazala troškove izborne kampanje u iznosu od 106.070,88 KM.

5.2 PREPORUKE

Preporučuje se Nezavisnoj bosanskohercegovačkoj listi da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da svake godine donosi precizan i jasan program utroška sredstava i da finansijska sredstva osigurana za finansiranje političke stranke koristi u skladu sa programom i statutom za ostvarivanje ciljeva političke stranke,*
- *da vodi poslovne knjige u skladu sa računovodstvenim propisima, odnosno da vodi tačne evidencije o svojim prihodima, rashodima i obavezama,*
- *da dobrovoljne priloge u novcu uplaćuje na transakcijski račun Centrale stranke,*
- *da vodi evidenciju o priložima, bez obzira na koji način ih ostvaruje,*
- *da se ne finansira iz izvora koji su političkim strankama zabranjeni,*
- *da obrati pažnju na ispravnost i vjerodostojnost knjigovodstvenih isprava,*
- *da finansijske izvještaje koje podnosi Centralnoj izbornoj komisiji BiH popunjava u skladu sa odredbama Pravilnika o godišnjim finansijskim izvještajima političkih stranaka i*
- *da poštuje odredbe Izbornog zakona Bosne i Hercegovine i podzakonske akte Centralne izborne komisije BiH, kojim se uređuje postupak otvaranja namjenskog računa i njegovo korišćenje isključivo za finansiranje izborne kampanje.*

KOMENTAR:

Politička stranka je u datom roku dostavila primjedbe/komentare na nalaze koji su navedeni u Preliminarnom izvještaju, ali bez dostavljanja relevantnih dokaza. Stranka je u svom komentaru navela da propusti nisu učinjeni namjerno i cilj stranke je da postupaju isključivo po odredbama Zakona o finansiranju političkih stranaka i uspostavljanje pravilne evidencije poslovnih promjena. Nedostavljanjem relevantnih dokaza, nalazi navedeni u Preliminarnom izvještaju su potvrđeni i u Konačnom izvještaju.

Pomoćnik revizora
Mr.sc. Goran Cicović

Šef Službe za reviziju, revizor
Mr.sc. Hasida Gušić

¹² Član 15.10 stav (2) propisuje da se maksimalno politički subjekt koji ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove narodne skupštine RS i Predstavnički dom Parlamenta FBiH, članove Parlamentarne skupštine BiH, člana Predsjedništva BiH, predsjednika i podpredsjednika RS, odnosno 20 feninga za izbore za članove kantonalnih skupština.